

光緒丙子清河縣志卷十七

仕蹟

明

李信圭字君信太和人也洪熙時舉賢良授清河知縣縣瘠而衝官艘日相銜役夫動以千計前令請得沐陽五百人爲助然去家遠艱於衣食信圭請免其助役代輸清河浮征三之二兩邑便之俗好發冢縱火信圭設教戒十三條令里民書於牌月朔望儆戒之且令書其民勤惰善惡以聞俗爲之變宣德三年上疏言本邑地廣人稀地當衝要使節驛絡日發民挽舟丁壯旣盡役

及老穉妨廢農桑前年兵部有令公事亟者舟予五人緩者則否今此令不行役夫無限有一舟至四五十人者凶威所加誰敢詰問或遇快風步追不及則官舫人役沒其所齎衣糧俾受寒餒乞申明前令哀此憚人從之八年春又言自江淮達京師沿河郡縣悉令軍民挽舟若無衛軍則民夫盡出有司州縣歲發二三千人晝夜以俟而上官又不分別雜泛差役一體派及致土田荒蕪民無蓄積稍遇歉歲輒老稚相攜緣道乞食實可憫傷請自儀真抵通州盡免其雜徭俾得盡力農田兼供夫役帝亦從之自是他郡亦蒙其澤正統元年用侍

郎章敞薦擢知蘄州清河民詣闕乞畱命以知州理縣  
事民有湖田數百頃爲淮安衛卒所奪民代輸租者六  
十年信圭奏之詔還民飢民攘食人一牛御史論死八  
人信圭奏之免六人天久雨淮水大溢沒廬舍畜產甚  
衆信圭奏請振貸並停歲辦物件及軍匠厨役濬河人  
夫報可南北往來道死不葬者信圭爲三大冢瘞之十  
一年冬尚書金濂薦擢處州知府其在清河已二十二  
年矣未幾卒清河民爲立祠祀之

按楊士奇有送信圭還清河詩曰當亡仁

明秉至誠瀕淮今歲少豐登憂勤屢下明廷詔撫字深  
資令尹能共愛温如元圃玉直須清比鑑池冰清河未  
必終淹騎雲路他年看爾升戴誠問擬寄信圭詩曰前  
年徵詔強扶疾花縣風光得相識今年遠賦還山吟孤

光緒丙子清河縣志

卷十七

帆重過甘棠陰愛客高懷重鄉里況有才華藉人耳淮  
甸垂休星彩明蓬萊報政天顏喜恩深閭闔亦何榮俗  
易絃歌信有成送行多見詞垣筆紀傳無慚良吏名晴  
衙扶步擬來賀沙岸侵江欵欲墮詩字聊將一寄聲船  
開未暇邀君和  
見乾隆志藝文

國朝

李用質濟甯人進士順治三年知清河縣事時值鼎  
革之後加意撫恤興利除害胥吏無敢舞文四年充鄉  
試同考官有以私屬之者用質正色曰士人初求進身  
輒欲欺其君乎或以疑事得罪且不測大吏檄下用質  
者再用質曰事所必無徒滋煩擾卒平反之其人往謝  
答曰此公事何謝爲其公正不阿類如此後陞兵科給

事中

管鉅字維庵臨川人少負經世才康熙二十六年知清河縣事興除利弊修學校建倉儲先是屯田之興吏士遵行不善盡割膏腴隱占居民數百家鉅爲請於大吏區畫經界躬自履畝日夜丈量不避風雨寒暑三年而後定至今清民得以安堵飽食鉅之力也又爲之均丁均糧使貧甲無偏累之患而豪猾亦不敢欺隱自便其私後升知甯州去時百姓扳留不得爲立去思碑

均丁均糧

皆有記見民賦其修倉儲則邑人丁象臨爲之記又嘗遷王營鎮招撫流亡邑人楊穆記之見建置

嵇曾筠字松友無錫人進士雍正八年官南河河道總

光緒丙子清河縣志

卷十七

三

督時秋汛異漲曾筠受事親履要害分洩洪湖逆流以殺水勢繼塞外河安東決口使黃水歸漕築禹王臺竹絡壩使蒙沂諸水不侵運河關六塘故道使駱馬湖異漲不致旁溢修高堰工築山盱隄埽引淮鬯流移天妃閘接清口壩以利漕運論者謂河道自張鵬翮後至此又一治云

黎世序字湛谿羅山人嘉慶丙辰進士卽用知縣洊升淮海道時南河總督陳鳳翔得罪遣戍世序代之初南河自有明末造逮於國朝破敗決裂聖祖乃特簡靳輔爲河臣繼以張鵬翮而大治安瀾順軌百有餘年

至是復壞其時兩江總督百齡有言曰海寓承平國家  
閒暇借要工爲汲引張本借帑項爲揮霍鑽營河員皆  
紈袴浮華工所眞花天酒地蓋至舊規全廢黃強淮弱  
豐工邵工睢工鄆工王營減壩蘇家山陳家浦馬港口  
疊次漫決河身中飽淮水南趨歲漕四百萬石待之以  
行顧此失彼左絀右支幾成瓦解土崩之勢世序適承  
其敝淡泊甯靜一湔靡俗修靳張之治以束水攻沙蓄  
清敵黃爲急其束水也主於繕隄防海口接築長隄使  
水不散漫而滌淤有力其蓄清也謹守五壩使清水長  
足糧艘得以浮送而黃河隄防之守則又恃乎閘壩於

是請建清河黃河北岸減壩及徐州之虎山腰減壩以  
洩異漲而保長隄而黃河暴漲隄工奇險則又於埽前  
拋碎石以搜護之故能轉危爲安蓋自嘉慶十八年迄  
於道光三年南河彫替之餘平成獲奏者世序之力也  
其埽前拋碎石也人言藉藉上達 九重致勞垂問而  
南河工員亦無不諫止世序毅然行之詢諫者曰君等  
謂碎石漸趨中浚將塞水道害在目前乎抑異日也皆  
曰不及四十年必當爲害曰不及四十年河流不復能  
在此矣其時爲道光元年至銅瓦廂之決三十五年碎  
石阻塞水道之說絕無其事而河流北徙言果驗南河

歲需以三百萬爲率世序當孔棘之秋工務繁興每歲必省二三十萬部臣猶駁詰之他人無事而必罄此三百萬部臣不言也其清操孤立如此以縣令起家爲循吏勤於治民及爲河督猶以民爲念召父老問疾苦見清淮地瘠民貧勸興種棉織布之利道光元年境內大荒設粥廠散錢米用官錢至大萬縣之 文廟圯修之崇實書院有燕家社膏火田六百畝前河督吳璥奪與普應寺僧世序復以歸書院課士極嚴一時士師之民父之卒之日邑中罷市巷哭數十年來所未有也 文廟以世序卒之次年落成士民建祠於右以寄思慕焉

通易理邑人蘇秉國著周易通義延與講論著河上易注梓行又有湛谿文集 宣宗知世序忠勤嘉之曰幹國良臣聞其卒震悼 賜祭葬如例諡曰襄勤

張井膚施人進士由知縣歷官江南河道總督初河水上游各閘壩皆有定誌值伏秋盛漲河督爲避險計往往先時啟洩民田受其害井上言水逾定誌始得啟放自是河流深刷田以豐稔道光初借黃濟運之議興漕艘過未及半率多膠淺井乃創爲灌塘法無借黃之險兼省盤剝之費一時稱便在官八年加築堰盱大隄增建滾水壩改挑揚河普賢墩孜孜規畫無不曲中窾要

每巡視工所嚴飭輿從一無所擾時以爲黎襄勤之亞  
李國瑞字石洲鄭州人舉人大挑知縣宰山陽善捕盜  
清理累年積案獄訟寢息堰盱河決縣城瀕危請於河  
督築護城河隄城得以保被水流民數萬人給費歸農  
後晉知淮安府事值綱鹽改票河北困夫萬人將嘯聚  
爲亂國瑞善撫之卒以無事清河東境便民河下入張  
家河爲民田水道以道光九年減壩黃流下注水道淤  
塞民間疏濬有文生糾衆阻挑前守禡革二人而飭民  
止挑國瑞至曰二生罪有應得安有民間水道而爲罪  
二生而止者乎復令興挑會調蘇州府去役中止迄於

同治八年後守章儀林始竟便民河之役民獲其利未  
嘗不追思國瑞也前後官南河七年人懷其德終於淮  
揚兵備道

唐汝明字黼卿劔州人舉人道光六年大挑知縣分發  
南河時兩江總督琦善開減壩放黃河北鄉人民蕩析  
汝明奉檄振撫周行泥淖境內賴以安輯十三年署知  
清河縣事十八年再署前後不及三年而境內大治初  
清河地本四鄉自移風懷仁兩鄉沈沒縣城傾圮割山  
陽之清江浦爲縣治治居境之東南隅而河北兩鄉地  
方五十里實居縣境十九以隔一大河自清江浦視之

有如異域清江浦建節之區地當孔道官署櫛比冠蓋  
輻輳司牧者趨走應接日無暇晷民事有不及過問者  
矣汝明泣任曰吾此來治民也豈爲上官役哉清河官  
民睽絕治者多以寬汝明獨嚴於訟盜尤急有訟者立  
決之決獄止兩造不牽累證佐無不心折雖被責亦感  
泣有巨猾善訟一獄兩造皆巨猾主使汝明訊得其情  
立捕猾置於法而訟風寢息縣境西接桃源北連沭陽  
東濱安東自道光紀元連年荒歉三縣邊地賊與境內  
游民勾結爲奸劫盜大起民不安枕盜無弋獲者汝明  
至捕得盜數人姦軌屏息盜不入境陳三虎本一游手

汝明見其詭異執而羈禁之安東令以三虎嘗有犯於  
其邑取以去旋釋之後爲大盜殺人無算同時有梁學  
典者亦安東無賴賣鹽於縣境汝明捕之逸去遂殺人  
行劫擾十數州縣官兵追捕迄不得然終汝明之身學  
典不敢入清河境汝明常閱北鄉月或數周見有汙萊  
閒曠之田必責其主者遇游手必懲初下車人畏之久  
而愛之矣蓋至是而後鄉人知有賢父母之樂也汝明  
歷任安東山陽寶應皆有循聲後陞海阜同知卒官  
楊以增字至堂聊城人喜讀書尤深於經學舉進士由  
貴州知縣積官江南河道總督當官勤慎自守初爲甘

肅按察使時林公則徐巡撫陝西嘗舉以自代疏言以增誠正清勤實爲臣所不能及其見推挹如此咸豐初河工當彫敝之後百務廢弛河帑發官票以增力爲撙節凡事必求有濟於實用而止豐工之決以爲法應遣戍檢行李載書盈箱備道塗省覽意曠如也 上知非其罪命視事如初粵賊破金陵鎮揚相繼失陷清淮岌岌日不自保以增奉 命督防江北一鎮之以靜募勇逆戰揚州聲言決洪澤湖灌賊營時賊已至邵伯埭聞之驚懼遁去因以其暇整頓卒伍搜緝淮徐亂民河北大定清邑舊有崇實書院嚴立課程增給膏火多所造

就求遺書得山陽潘德輿養一齋集謂是古之大賢淮郡人士若知宗仰當無近今搢紳之既有未梓行之養一齋劄記所述皆有益人心世道亟命鋟版會以增卒事遂中止卒之日庫存甚富而私橐蕭然八以爲清如黎襄勤云郡人旣請崇祀名宦更爲請諡於朝諡端勤曹文昭介休人由舉人歷官揚河外北通判裡河同知時洩黃水由六堡入湖清江浦幾沈沒文昭立加築隄工長數千丈竟以無恙晉淮揚兵備道嘗設豐濟倉以備凶年粵賊竄九江文昭上言大府請於清江設立安鎮局儲侍饗精嚴爲防守賊不敢犯後擊賊揚州以積

勞卒於軍

朱善張平湖人邑庠生道光中以倡團保衛鄉里得階通判分發南河歷任桃南邳北豐北中河通判復以勦捕粵逆功晉裡河同知爲人明敏有方略咸豐六年歲大旱河水斷流乃請於河督堵雙金閘而別引微山湖水入中運河民田資灌溉之利遂獲豐穰嘗督勦海沭幅匪及黃河海口洋匪擒獲無算賊張隆者踞長淮鹽道梗塞善張遣兵火其舟賊遁去十年豫逆竄清江浦善張時方在揚州聞警立率兵夜至淮安尋以克復清江浦功署淮揚道駐揚州賊首偽英王自六合竄儀徵

光緒丙子清河縣志

卷十七

九

進攻揚州踞平山堂以瞰城中善張登陴固守尋敗賊於七里店又追擊於儀徵西又遣兵擊之於平山堂追至甘泉山圍始解同治二年以督饟卒於沛縣軍中于昌進字湘山榮城人由附貢生官南河歷署睢南海防宿北同知補裡河同知精實幹練孜孜奉公每伏秋異漲大府倚昌進以辦晨夕風雨中屢瀕危險卒無僨事道光二十二年河決中牟工下游千里率成平陸漕艘壅楊莊之塘河不得渡昌進建策闢清口引淮濟運以暢行二十七年夏河大漲吳城隄將潰清邑適當其衝搶堵掃工十餘日不可守民情洶懼昌進請於河

督刷七堡隄洩水入湖清邑數十萬生口遂獲無恙當是時南河號積弊區 天使驛臨有所驗問案牘糾纏百端自舊官宿吏人人袖手噤不敢置對惟昌進深悉其機牙條晰而梳櫛之以故先後河督麟慶潘錫恩楊以增無不禮重昌進若左右手厯奏以沿河知府河工道員補用嘗蠲俸修文曲溝建王漁洋祠尤喜獎掖後進凡書院課士訂膏火別良楛必豐必飭粵賊之踞金陵陷揚州也清淮居民晝夜十數驚人無固志昌進首議招募練勇設局曰安鎮聯絡城堡部分肅然時知清河縣吳棠方署邳州事昌進言於大吏曰事亟矣定亂光緒丙子清河縣志

止暴非棠無可與集事者立檄回任清河截畱潰勇搜緝土寇馳檄四方尅期滅賊河北人心大定昌進本謀也以風痺去官未幾卒年五十一

吳棠字仲宣盱眙人也幼勤於學家奇貧不能具膏火讀書恆在雪月光明之下以舉人大挑補桃源縣俗號强悍善治者率以猛棠獨以寬有獷惡子素橫於鄉里一日方與人鬪嚴按之極口唾詈聞者以爲卽捶楚死矣棠姑使拘繫次日跪堂下涕泣求死遂婉譬而釋之卒成善良久之鄉閒不見有吏人迹時躬巡四野每止宿老婦則手雞卵數枚以獻曰公食無肴也三年大治

調清河清河與桃源接壤民俗柔弱素懼桃源自棠宰  
桃源而清河境上無擾以此久感服至是益大喜如家  
人父子相親以邳州多盜調署去禽斬數百人咸豐三  
年粵匪踞金陵陷揚州淮郡戒嚴復檄回任清河招集  
民勇申明紀律鄉鎮立七十二局練勇數萬首尾聯絡  
並傳檄鳳潁廬泗滁宿徐海各府州縣指天誓日勇氣  
百倍淮揚數百里閒隱然恃若長城以憂去官皖逆既  
大起土寇緣之橫行民請衰經而治河北盜當路不善  
也袁端敏公督漕將於江北興圩練之役以棠任其事  
當路又不許去守徐州十年皖捻李大喜遂陷清江浦

始檄署淮海道道路經過火壁灰竈殘肢剩體與民相  
視而泣方整頓傷夷誅鋤蘊孽掬有綱紀而以 特旨  
授淮徐道去淮徐之民爭互攀畱致相讐疾旣蒞徐州  
道任修寨保民賊數至不爲害尋有江甯布政司署理  
漕運總督之 命以十一年除夕履任先是清江浦旣  
灰燼論者以爲墮甑不宜復顧宜卽淮安府城舊漕署  
居守爲便棠至則謂清江浦四達衝衢使賊得之勢益  
鴟張山陽以下豈得獨完哉於是駐師瓦礫之中築河  
北土圩春初賊果大至版築之聲與礮火相閒也賊直  
薄圩下居民皇皇翹足思散棠植立圩上手發巨礮賊

遂敗退仍踞桃源之衆興鎮將爲持久計我兵單饜絀援兵雖集而不爲用乃飭都司陳國瑞馳赴衆興賊壘旁爲營以逼之時出不意以遮擊之不十日而賊遁境內又安民得穫刈旋築清河縣城屹爲重鎮四鄉圩寨次第興修同治五六年間賊再竄擾皆不得逞旋就殄滅堅壁之效也海贛土匪各結圩砦嘯聚成羣同治初時結西逆相殘殺頗爲清淮患棠以計撫之收其豪士人肄業書院武夫注籍卒伍反側以安皖逆苗沛霖素有逆謀以淫殺威劫聞於遠近及反急攻蒙城千里以內士無固志棠命陳國瑞出師援勦蒙城圍解苗逆伏

誅而清淮之圍練始徹民獲小休則創建 文廟之大成殿並建崇實書院置義學四所經師課誦人文大起自黃流北徙淮水南趨運河無糧艘者數年棠擢節饟需以其贏餘購米四萬餘石首試河運募顧民船見者呼曰小糧船小糧船至今不廢河督旣并於漕督御史請裁河員汰河兵而部議增設淮揚鎮總兵並酌定營制疏令漕臣核議棠議以清江浦旣爲重鎮則駐浦之兵力宜厚請設鎮標左營及城守營與中營並駐清江浦其餘量爲變通凡十一營改修防爲操防悉隸鎮標又以河運兩灘未經墾佃之處試行屯田之法劃予

各兵督耕充饗以自然之利養有用之兵規模大定矣  
自咸豐初元江蘇全省破敗棠起家縣令撐拄補苴至  
清江浦既陷而棠赴徐州汴唐殲賊秉節東來所以奮  
怯完殘効忠忘倦者前後近十餘年 天子嘉其勞卽  
眞漕督復授江蘇巡撫升兩廣總督皆以江淮未戢請  
畱不果行同治五年奉 命督閩浙七年補授四川總  
督光緒元年乞病歸取道秦豫自徐而淮居民焚香頂  
祝望見顏色歡聲雷動猶家人父子久別得聚首也蓋  
棠之忠勤勞瘁盡於江淮矣歸後不一月卒於滁事

聞 褒贈有加諡曰勤惠淮人請於清江浦建專祠歲

時致祭焉

章儀林字秋亭其先紹興人以父卒官山東遂隸固安  
籍幼孤奇貧隨族人游京師久之由供事積資官南河  
通判咸豐初河決豐工塞之已復決望吏議捐資復官  
當是時河工極敝而軍事方驟興大吏深相倚重儀林  
獨毅然不肯畱以引見入都行未幾而清江浦有李大  
喜之變同治元年盱眙吳公棠爲漕運總督以儀林參  
軍政議每不合然事後益重儀林自軍興以來前後再  
司饗需數年洗手供職絲豪無所染吳公每歎曰章君  
廉吏也授知淮安府事濬山陽市河涇河修各溝渠葺

考棚建書院百廢咸舉初山陽民以市河當濬與不當濬持兩端歷牒大吏久不決至是頗逆大吏意或以爲言儀林笑曰吾知利民而已違恤其他捻賊竄山東沿海大擾請於漕督界海沭築長圩六塘河南岸以禦之綿亘百里繭足風雪中四旬而圩成捻酋賴汶洸窮蹙困踣卒以授首長圩之力而首發其議終堅成之者儀林也清河安東兩縣民極罷爲請貸官錢疏河通潦並爲清河民除累賦已有緒以不合大官意立投劾去旣而歎曰吾民何罪其不獲了此矣掃除官法獨身任其役首尾凡三年兩縣水利及除賦事皆定儀林爲人懇

至質白不欺其志見義如渴嗜飲飢嗜食意有所赴不避勞怨必要其終其天性然也尤嚴於自守居官三十年寸絲斗粟未嘗有所藉雖家人皆漸其教焉孝事嫡母與所生母曲盡色養無閒言兄弟九人析居時儀林方孺稚長乃復合撫諸姪如子居喪哀毀幾滅性自斂至於殯葬一依於禮人尤以此難之幼以貧廢書及官南河銳意力學嘗謂人曰吾生平無歉於志惟念少時衣食奔走不得廁名甲科以俗吏爲當世所輕斯可恨耳吾子若能成吾之志善讀書爲好秀才於願足矣以故罷官後日手經傳一字之疑必以問人課子或逾夜

分不輟云光緒三年卒年六十五

光緒丙子清河縣志

卷十七

十五